

Coriintoo nenacaauru rai

Faborohacha letoai coroataja

Coriinto cocoaichacuru rai “Raotojoein neeuche,” naa Faboro.

1 ¹Canuna Faboroneeun. Cana Coanera jerihane jaunne, rai Calaohi Jesocurisito letono afosotoneeun. Cana nejera Timoteo aina jiniiquina, Acaiha batane que nenea Coriintoo Jesocurisito ranojoein iclesianeein neiniquichene rai, chaen nii Acaiha batane sacutaain Cana Coanera cachaneein satiin neiniquichene raine maajeeine caa quiricha laenacaanu.

²Cana Curuaanaa Jesocurisito, Cana Inaca Cana Coanera, naonjoaihunri raotojoein jianacoon rachoojoein neeichene jaanu teuruhine inara rai.

Necairichaane biha Faboro.

³Cana Curuaanaa Jesocurisito Inacaneein nenea Cana Coanera coroaecaachenete ne. Acate satiin Cana Inacaneein nihane jaun, cairichaojoain cana coaraain cana necairichanaja caje cana suujua nunaeranein ne. ⁴Acate satiin itolere necairichaacachene jaanru caje, cairichaojoain cana coaraain, cana suujua nunaeranein ne. Nitohaneinte cana netonai nii cairichaojoain cana coaraain cana suujua nunaane rijjijeein, necairichauruha leeochoaurune coaraain,

cairichaojoain acaauru coaraain acaauru suujua nunaain nenea caina ichae Cana Coanera. ⁵Nii mainajeein necairichaalu Jesocurisitone te, canacaanu que nerotokane jaunne nii aihalune rijjijeein necairichanaa abaantaacaanu. Nii rijjijeein techu nii Jesocurisito aina cuaain cairichaojoain leeochoauru coaraain nihacaanu. ⁶Nitohaneine necairichaacaanu, inara netonai ichoteratenojoein inara suujua nunaeraanu siriin nenea nainiquichene caina. Nii rijjijeein techu, Cana Coanera canacaanu suujua nunaane, inara netonai suujua nunanohinein neriquichein, aina cuaain itolere necairichanaa abaantaain neeichene caina. ⁷Nitohanein neriquicheine esenetaacaanu. Charijjein teinti necairichaacaanune rijjijeein inara netonai necairichanaa abaataain neeiche. Nii rijjijeein techu cairichaojoain cana coaraain cana suujua nunaain cana rai Cana Coaneraacha tei sirichaneein neeiche.

⁸Canejeraauru, Asia batane que necairichaacaanulune coaacuche. Ecune jataain mijiaaineein cairichanojoein cojunojoinichaanulu. Nii jaunne inae abaantasinihacaanune jaun, “Inae jecha orichaanuhi,” naacaanu, ⁹ohacaanune caina ichara tocohanein

cairichanojoinichaanune jaun. Nete Cana Coaunera onaa ichateein ichotera-nihane que jaaequiin nihacaanune coina necairichaacaanulu, Cana Coaunera colane nenea rijijieein canacaanu jaberocohacha nejesina que itolere bana jaaecohacaanune coataa. ¹⁰Nii Cana Coaunerate, necairichaaïn ohacaanune rai nihacaanune caje canacaanu ichoteratelu. Nii rijijieein techu satiin cana ichoterateerein, ohin nitajenaa rai nenea caje. Acatechu ohacachene bana nitaje rai niha cana suujuene caje, cana suujue ichoterateraneein nereein. ¹¹Nitohaneeinte cana ichoteratejeein sacureein, canacaanu aina bajaebajae-quichene. Arajii cachaauru canacaanu coreniha Cana Coaunera bajaanete, arajiin netonai Cana Coaunera coroaecurureein, canacaanu rai caohacha ichaane coreniha.

Coriintoo cuenihane biha Faborone

¹²Jataaine raotojohacaanu inara coritana coacuelanaala, niheichu chatohaneein caa chauratane que baaso ichaelanaala, niheichu inara aina nihacaanulune bana inara rai baaso ichaenhacaanulune jaun. Coatiha canacaanu raajenhane cha coitucuera nihacaanune jaun aihahacaanu. Cana Coaunerate jataain canacaanu belaitohane jaun, nitohaneei ichaoha-caanune jerihana jaunna aihacaanu. ¹³Caa inara rai canacaanuhacha laenanajaqui quirichaauru cuhane, coatiha leechaneein inaraacha coitucunaa nainiheï laenahacaanu. Bajaanachuinti jitaain aonaain caohatiin coitucuneeiche. ¹⁴Nii reretaain aonaain coitucuhichene rijijieeinte, canacaanu coreniha raotojoein neriquicheein, inae nacoauneein turuha Cana Curuaanaa Jesocurisitone bana. Nii rijijieinechu

canacaanu netonai raotojoerichaanuhi inara coreniha inae turuhane bana.

¹⁵Niritiin esenetaainna niqui, jauriaa-nejeein inara coaraa unaa jereeuñlu, atiin coroatasaain inara rene bedaenchaaunne coina. ¹⁶Jauriaanejeeine niqui, Masedoniau cuujihataain inara rene bedaenena jereeuñ, coaiteen caje caaujihataain nacoaauneein bedainichaaunne baiha jelai caje coauneein Jodea cuhanune que, nainequichene canu coroatajanequichene coina. ¹⁷Niheichu canuhacha ichaneni coaucaaanne, coatiha inara coritaa inae leesajeein "Airichaaunni," naanune, canu suujua cuhane "Airihaaunni," naain coacuhin irihaan. ¹⁸Cana Coaunerate, inara rai cha que erenaa jerichaanune "Airichaanuhi," naacaanune canacaanu suujua cuhane "Airihacaanuhi," naenhacaanune coaraje. ¹⁹Nii rijijieein techu, canu, Timoteo, Siribano, naaonjoainichaanune, inara rai canacaanuhacha beebejei Cana Coaunera Calaohi Jesocurisito esinae rauhijiriin acaneein ne. Nii Jesocurisitote esinae rauhijiriin ichaane coina, "Icharichaaunni," naa Cana Coaunera, suujua cuhane "Icharihaaunni," naelanaalane jaane. ²⁰Nii aina cuaante, satiin niicha ichaneni niicha coacuilu ichae Cana Coaunera. Nii jaunte, Cana Coaunera corojeein bajaacachene, "Nitohaneein ichamiin Cana Coaunera, Jesocurisito aina cuaain" naacache. ²¹Chaen techu Aca cana janijiin cana taojiaain Jesocurisito aina cana teein, "Caaurute canu cachaauru ne" naelu Cana Coaunera. ²²Nitohaneein cana janijiin cana raainte, rai cacha cojunacatihane jaanque cana cojunacateein, cana rai rai Suujue telu Cana Coaunera, esinae rauhijiriin cana rai niicha teenu ichoacha teranu que.

²³Nena jaiti nii coaaucaaulunlune rijijieein Coriinto inara rene turuha uhenihanune, inara rai caohacha ichaa aihun. Cana Coaunerate inara rai caohacha ichaa aihanune coitucue.

²⁴Coatihachu inae caohatiin coitucuhin esenetaaichene jaun inara rai, “Naaonjoain ichaquichenete caohachae” naain erenaa nainihacaanu. Raujiaainchana inara coroatajanena jerichaanu, raotojoeiin rachoojoeiin esenetaaichene rijijieein neeichene coina.

2 ¹Nitohanihane jaunne nabana inara inaderaacaaulunlune coataa, nacoauneein inara coaraa unaa jerichaaunne baiha aineeun. ²Inara inaderaacaaulunlune, neneriha raotojoeiin canu rachoojiaeraanune jaun. ³Nii jaunne inara rene turuelanaala, raujiaaincha inara rai quiricha cuhane aitiin laenaaulunlune, canu inaderaaquichene coina inara rene turunaa jerenihanune jaun, inae turuhanune bana inaderanaa coacuelanaala, nenacaeneinjia jiniiquiin rachoojihacachene coina. ⁴Nena laen nii quiricha laenacaaulunlune bana, jataain inara coacuhin que nererojoeaain chanaaulunlune. Coatiha nii que coacuhin inaderaaichene coina nii beein laenahaaulunlune, jataain inara belaichaaunne coitucuhichene coinane niritiin beein inara rai laenaaulunlune.

“Nii canu que nejeratena que inara suujua acatecuche” naa Faborone.

⁵Nitohaneein inara rai baaso ichara cacha, canu raaicha inaderanaa tiha aiheilulune, inara rai netonaite inaderanaa tiha ailu. Amuritiin rohin aitonaa jerenihanune jaunne caa caritojoeiin aitoon. ⁶⁻⁷Inae nii cacha aina nejerateein mainajeriin casetecaachene jianein, que inara suujua acatein, belaaain coroatajanecuche, nabana joenreein suujua cuuaain inaderaane

niicha ichanenu coitucuenihane coataa. ⁸Nii jaunne inara rai aitoon, jauriaanejeiin belaiquichelune rijijieein belaaichene coina. ⁹Esinae rauhijiriin, canu ere tonoraain rijijieein ichaquichene coaracaaulunlune coinane, nechu inara cojuha inara rai quiricha cuhane aitiin laenaaulunlune. ¹⁰Nitohanihane jaunne, inara suujua acatequichene jaanque canuhetonai casuujua acatereeeunni. Aiha niha chatohanai que casuujua actichaaunne jaanunena, Jesocurisito notaracaae que casuujua acatereeeunni inara coreniha. ¹¹Nitohanein ichaohacachene, coatiha canaque niicha jerei ichana nainerinaain moconajaera, inae raotojoeiin rai nerurujua coitucuhacachene jaun.

Toroasihu turuhin raotochojoaeniha rai suujuaane biha Faborone.

¹²Jesocurisito beratenojoi beebelijhanu cachaauru raine coina, Toroasihu turuhanune janate, Cana Curuaanaa jerenohi ichacaaunne coina jatoroaain neeunlu. ¹³Nena ecu cana nejera Tito eruhenihanune jaun, raotenelu casuujua. Nii jaunna ecu nenacaauru rai necoeiin jelai caje amuhin Masedoniau cuunlu.

Jesocurisito ainate namuritoroatena coacuelanaala nihacache.

¹⁴Nariha Cana Coaunera itolere bana namuritoroatena coacuelanaala, cana aina cuuaain Jesocurisitohacha ichai naitoonjoa beratihane jaun, itolere sacutaain bihacachene coreniha. Nii canaque naitoonjoa niicha berateite, aiha jujuhine rijijieein itolere lomoritiin riaanein aonanojohi ne. ¹⁵Canacaaunna Cana Coaunera rai Jesocurisitohacha mocoli jujui rijijieein, inae nichotenaanein nenacaauru rene, nitaje rai nenacaauru rene,

naonjoainuri rene letono neein nihacaanu. ¹⁶Nitajerai nenacaauru raite, leinjiin jujui cacha atinaeraanunein toni nii canacaanuhacha beebejei. Nete laen nichote rai nenacaauru rai, leinjiin jujui ichaonaateraneein toni nii canacaanuhacha beebejei. Nihei chuni cacha nitohanei ichana naineraneein nei. ¹⁷Chabana aihuruha leeochoaurune tocohanein, Cana Coauneraacha beratenojoi beebejihacaanune coreniha, canacaanu coretera jerenihacaanu. Nenacaennejian nitohanein nenea coacuhelanaala, esinae rauhijiriin nohanelanaala Cana Coaunera notaracae, coujurihi rai letononein netiin inara relaacaanu, rai calaohi Jesocurisito cachanein nihacaanune jaun.

Ena nenea Rauhi Cana Coauneraacha tei

3 ¹Niritiin inara rai irihacaanunete, jerihane nechua caohachaa in canacaanu raauruha itolere cachaaurune coina necoasitaa aitoha, canacaanu beeiche. Niritiin coaauquichene coataa, coatiha aihuruha nii leeochoaurune rijijieein, cajihanein amuhemujueein: “Canacaanune naonjoaineeinne nihacaanu,” naain cachaauru rai ereein nihaacaanu. Niheichu inara rai nihanaatiin chabana, “ ‘Naonjoaineeinte neeure,’ naain canacaanu beein cachaauru rai quiricha laenacuchete aina canacaanu raauruhine,” naain chabana inara rai irihacaanu. ²Inaraachane latichaanu, inara aina cuaain inanacaa canacaanu suujuau tenojoin que inara relacaanune coarateeiche cachaauru quene coina. Nii ainate canacaanu ichanaa coaraain canacaanu coitucuurureein cachaauru. ³Nitohaneinte, quiricha laenanohineein nenea rijijieein, Jesocurisito ichanohineein, cachaauru rai canacaanu aina cuaain

teratenojieein neeichene coaracure cachaauru. Coatihani ni aiha quirichalaenanohine rijijieein niheeiche. Inarate Cana Coaunera Suujue ichanohineein nitohanein neeiche. Niheichu atane jeeu que tein laenanohi rijijieein quirichanein neein niheeiche. Inarate cachaauru suujuau canacaanu aina cuaain Cana Coaunera teratenojieein nenea que suujuequini neeiche.

⁴Nii jaunne, Jesocurisito aina cuaain, nii aitocoaanune rijijieein ichaa Cana Coaunerane esenetaacaanu. ⁵Coatihacanaaanu raajenihane nitohanei ichana nainerihacaanu. Cana Coaunerate, nitohanei ichana inaeranein canacaanu tein ne. ⁶Nii jaunte Aca canacaanu relae, nii enachasine rauhi naitoonjoan beranein nihacaanune coina. Nii rauhi coatihalaenanohineein nenea nihei. Acate jeriha Cana Coaunera suujuene rijijieein nenea ne. Nii laenanohineein nenea rauhite, tonoraeniha cachane ohin nitajihane coina aitelu. Nete laen nii ena nenea rauhi jeriha Cana Coaunera Suujuene rijijieein chabana nitajeniha cachane coina ichaonaa tera ne.

⁷Nii rauhi atane jeu que tein laenanohineein nenaate, uhaa Moisesane jana, rai nomeri coana nainecurenelu Isaraelitacuru, jataain jiquihacoha nii niicha uhai caun rai nomerine jaun. Nii rai cono jiquihaque, jacaain satonohelu. Nete, nii rauhi cana atinarateranein nihane saijieein, jataain necaohachaa in cojoelanaacojoaain ocochin nelu. ⁸Nii jaun techu jataain nii amuritoheriin necaohachaa in cojoelanaacojoae nii ena turunaa Cana Coaunera rai rauhi-cana suujuecuhane niicha tei rai Suujue. ⁹Nitohanein, itolere canaacha ichai ujuaihonein nihacachene coina tenojoinihane saijieein, cojoelanaacojoaain nihalu, nii

cha ujuaihoneein nenea coina tenojoine jaunte, nii amuritoheriin cojoelanaacojoaain nereein ena nenea rauhi Cana Coaunera tenojoi, cha ujuaihonelanaala nenea coina canacaanuhacha beebejei. ¹⁰Nitohanihane jaun, coatiha inae chaque nelateein nihei nii jauriaanejeein nenea rauhi, caa ena nenea rauhi jataain caohachaain cojoelanaacojoaain amurijiriin nihane jaun. ¹¹Nitohaneein, nitajeraí nihane saijieein, jataain cojoelanaacojoaalu nii jauriaanejeein nenaane jauntechu, nii amurijiriin jataain cojoelanaacojoaain nereein nii chabana satonoelanaala neenihu.

¹²Nitohaneein nii que jaequiinne, satiin acatiha queecha ereerejihacaanu cachaauru rai. ¹³Coatiha aihalu Moisesane rijijieein, canacaanu meri conajaain aihacaanu canacaanu. Moisesate, nabana jacajeein cuha nii nomeri jiquihaquine coaracuruha Israelitacurune coataa, rai nomeri conajaain ereeretelulo acaauru rai. ¹⁴Nete nii naitoonjoan aonaain coitucusichurenelu Israelitacuru. Enanetojoeinte nii inoaenlu nenea cana aina Cana Coauneraacha ichanenu naitoonjoan ereretaauruhane nihanatiin aonasihurene, jaiti acaauru suujua aina, acaauru nota caje itajenojoineniha nii conaarane jaun. Jesocurisitohachate naine, nii conaara itajeein niha cacha caje ne. ¹⁵Nitohanihane jaunte, enanetojoein nii Moisesa rai rauhi ereretaauruhane nihanatiin, acaauru suujua aninoaane jaun coitucusichurene cachaauru. ¹⁶Nete laen naosatihajeein ichaohane jianein, Jesocurisito esenetaain ichaoha cachane, nii cha coitucuhane coataa, rai suujua conaara itaje rai Jesocurisito. ¹⁷Cana Coaunera Suujueneein niha Cana Curuaanaa Jesocurisitone jaunte, itolereenein niha nii rai Suujuene jaunru, raotojoein

ichaohin, cha ujuaihonelanaala neeureein cachaauru. ¹⁸Inae cana, Jesocurisito ranojoneein nihacachene jaunte, inae cana caje nii cana suujua aina cana nota conaara itajihane jaun, aiha esefejo conone rijijieein conohe, cana aina jataain caohacha ichaa Jesocurisitone jaan cono. Nii jaunte Cana ichao corihajeein sacuha itolere bana Jesocurisito rai Suujue aina cuaainne jaun, rijijieein inae ichaohacache.

4 ¹Cairichaaajoaain cana coaraane jaun, canacaanu rai nii amihanenaa tiha Cana Coaunerane jaun, nii canacaanu rai niicha tei amihanenaa bihacaanune coiinteein jianena nainenihacaanu. ²Nii jaane coejenacai ichana coacuelanaala, niheichu asinojoneein cha ichaelanaala, itolere que jaolequiin satiin notaracaee niicha icharatei ichacaanu. Coatihachu chaen canacaanu esenetaa cachane jerenacaanu, nohanein nii Cana Coaunera beratenojoi udaa cuaain cacha relahacaanu. Nitohaneeinne cacha coritana coacuelanaala, esinaen rauhijiriin nii canacaanu coitucuhichene rijijieein, Cana Coaunera notaracaee aitocaaanu. ³Aihane jaun chunocoha, nii osa caje cana ichoteraanu canacaanuhacha beebejei aonaane saijieein coitucuenihanete, inae nitaje rai nihane jaun aicheein. ⁴Inae esenetaaurenihane jaunte, maosa rijijieein acaauru te moconajaera, nabana jataain necaohachaa Jesocurisito Cana Coaunera rijijieein nenea tenojoin ichaonaane coaraain coitucunaa nainecuruhane coataa. ⁵Coatiha canacaanu ichaoque inara relahacaanu. Acaihanijin Cana Curuanaa Jesocurisito ichao quene inara relaacaanu. Jataain canacaanu belaitoha Jesocurisitone jaan aina cuaainne inara rai caohachanu ichaera-

neein nihacaanu. ⁶Charijjeein teeinti nocohena jana conoha conone caina aitoha Cana Coaunerane jaun neconaelu cono. Nii rijijjeein techu nii jeelai Cana Coaunera canacaanu suujua cuhane rai cono teein ne, aina cuaain Jesocurisito merique conoha rai conone coitucuhacaanune caina.

**Canaacha esenetai aina cuaainte
ichaohacache.**

⁷Nete laen nii Cana Coaunera tenojoi jataain nelatei raain, chaque nelatelanaala aihā atane codarojoene rijijjeein nenaā cana jaberoco cuhane sirichaache. Nitohaneeinte chaneēi nenihacachene saijjeein cana aina cuaain rai nelate coarate Cana Coaunera. ⁸Nitohanihane jaunne necairichanaa coaracaanune nihanatiin, canacaanuhacha ichanenu chacaanu, chaque casilanaala. Coatiha chabana amuritonajoinein nihaacaanu.

⁹Canacaanu ariiriichuruha canacaanu sohin jaoruhane caina niqui, nete canacaanu nainatejene Cana Coaunera. Canacaanu comaauruha niqui, nete canacaanu itajenaa nainesihurene. ¹⁰Itolereenein cuhacaanune jaunru nihanatiinte, aihalu Jesocurisitone rijijjeein cairichanojonein ohacaanune rai nihacaanu, ichaohalune rijijjeein canacaanu aina cuaain rai nichao coaracuruha cachaaurune caina. ¹¹Jataaina necairichaacaanu, Jesocurisito coreniha canacaanu atinaauruhane rai neeuruhane jaun. Nitohaneeinne Jesocurisitohacha tei ichaonaa que ichaohacaanune coaratiha-

caanu. ¹²Nitohaneeinne ohacaanune rai nihacaanu. Nete laen inara, inae raotojoein ichaonaaque ichaohiche, canacaanu que inara rai niicha teratei ichaonaa coreniha.

¹³Nii que te, “Esenetaanune jaunne ereeun,” naain aitoha Cana Coaunera Quiricha cuhanene rijijjeeinne,

canacaanu netonai jerichanejeein esenetaacaanune jaun, que ereeree- caanu. ¹⁴Nitohaneeine nihacaanu, ohane caje Jesoso ichatihalune rijijjeein, onaa caje canacaanu ichaterichaain Cana Coaunerane esenetaacaanune jaun. Nitohaneeinte onaa caje cana ichatein cana rareein nacatiha rai calaohi aina jiniiquiin nenaā caina. ¹⁵Nitohaneeinte, jataain caohacha ichae inara rai Cana Coaunera. Nitohaneein araai laurii que inara coroatajaniha Cana Coaunerane coaracuruhanete, araai laurii cachaauru netonai Cana Coaunera necaohacha coroaecurureein. ¹⁶Nii jaunna chabana bihacaanune jianena coacuelanaala, niheichu namuritoroatena coacuelanaala nihacaanu. Cau caa ichaonaa que ichaohinte inae binaanihacache. Nete, cana suujua cuhane, itolere janonaa bana nenamanacainaacache. ¹⁷Cau caa chauratane que ichaohin necairichanaa sorotiin sareein. Nete, nii necairichanaa coreniha, jataain nii amuritohe- riin, chabana sanaacharanejeein nenaā ichaonaa rarichaacheein. ¹⁸Aihana jaun nainihei itolere cana notaracae nenaacha que coaaucaachene. Nii chabana, coaraelanaala nenaacha que coaaucaachenete caohachae. Nii satiin canaacha coaracurite, satiin nitajerai ne. Nete laen nii chabana canaacha coaraai chabana nitajenereein.

5 ¹Canā jaberocote cana amunajau leinjiin loanari sorotiin nelatenenu rijijjeein ne. Nete laen chatohaneein itajenojiniha nii cana jaberecone niha natiin, dedeeu cana jaberoco ena nenaā rucuheca Cana Coaunerane coitucuhacache. ²Nii jaunte ichanohineein nenaā, chabana nitajenaachara jaberoco cuhane inae ichaoha cunaa jere canacaanu suujue. ³Nii jaberoco te laen canacaanu suujue que necurujuareein, machoequuin nenaane rijijjeein nihane

caje. ⁴Jaiti nii loanari rijijieein nenea cana jaberoco que jaberocohin ichaoha-caanune jaunne, cha lateein, nererjoe-caeriin, naaonjoaain ichaohacaanu. Coatiha itolere bana, nii canacaanu jaberoco que ichaohacaanune colatiha aihahacaanu. Inae nii canacaanu que banihateein Cana Coaunera ichanohi jaberoco que ichaohacaanunete, nii canacaanu jaberoco jauriaanejeein loanari rijijieein nenea, nii ena nenea canacaanu jaberoco jana nitajereein. ⁵Cana Coaunerate nitohaneein nihacaanune coina canacaanu relaan nii ichoae tacaain canacaanu rai, rai Suujue te, nii cana rai naitoonjoan sirichaneein nerichaanuhine cojunacanu que. ⁶Nii jaune satiin nii canacaanu rai naitoonjoa terichaaaine coitucuhin esenetaacaanu. Jaiti canacaanu jaberocooneein ichaohin nihacaanune jaunne, Cana Curuaanaa rohan neniha-caanu. ⁷⁻⁸Ena niqui coarahaacaanu rohan jaiti nenihacaanune jaun. Nete nitohaneein nerichaanuhine coitucuhacaanu, jataain esenetaacaanune coreniha. Inae niqui caa canacaanu jaberoco ratiriin Cana Curuaanaa rene turunaa jerichaanu. ⁹Nii jaunne cana Curuaanaa jerihane rijijieein itolere bana ichaorichaanuhin, ohin, ichaohin, naaonjoaacaanune nihanatiin. ¹⁰Inae itolere baaso ichara, caohacha ichara, naaonjoain ichao coitucuhane coina niha Cana Coaunerane bana nacatiha tururichaacheein, baaso ichaain, caohacha ichaain, naaonjoaacachene coitucuhin, lecachanichaachene ichanohi coitucuhin rai niicha tenaa jerei tihane coina.

**Aina raotojoein nihacachenete
jere Cana Coaunera.**

¹¹Nii jaunne inae coitucuhacaanune jaun, jeriha Cana Coaunerane rijijieein

ichaaoruha cachaaurune coina acaauru que jereratiha acaauru rai ereerecaanu. Cana Coaunerate canacaanu coitucuhin, canacaanu suujuane maajeein coitucue. Bajiaanachuhinti esinae rauhijiriin rai letononeein Aca jerihane rijijieein ichaohacaanune coitucueneeiche inara netonai. ¹²Coatiha canacaanu raajenihane necohasitaa caa aitohacaanu. Nenacaanejian raotojoein coitucuhin nainaan, nitohaneein suujua cuhane coaaralanaala nohaneein inara relaa nocoetona-caauru tonorana nainequichene coina caa inara rai aitocoaanu, nenacaain inara coritaauruhane esenetaaichene coataa. ¹³Jeriha Cana Coaunerane rijijieein itolere ichaain nihacaanune jaunte, leinjiin jaelorohe nerurujua cha que nelatihei rijijieein coaracure leeochoauru cachaauru. Jana inara, esinae rauhijiriin caohatiin coacuhin aihacaanune coaraqichenete, inara caohachanu que aihacaanune coitucuriquicheein. ¹⁴Jataain cana belaitohane jaunte, cana ichao rucuhereenein beraichaneein ne Curisito, aca satiin ichao coreniha ohalune coitucuhacachene caje coaaneein nunuheteein. Nii ohane aina cuaainte satiin cana netonai ohacachelu rai ichaonaa que ichaohacachene coina. ¹⁵Nitohaneainte satiin cachanichaachene coreniha ohelu Jesocurisito. Inae satiin cana coreniha ohalune coitucuhin, esenetaain nihacachene jaun jeriha cana suujuane rijijieein ichaonaa coacuelanaala, Aca jerihane rijijieein ichaohacachene coina. ¹⁶Canacaanu netonaine niqui, nii namute cacha que coaacuruha Cana Coaunera coitucuhichurune rijijieein Jesocurisito netonai que coaurejeto-coaanulu. Nena laen inae enene nitohaneein coacuenihacaanu. ¹⁷Aihane jaun inae Jesocurisito aina jiniiquiin

esenetaain ichaoha cachanete, inae nii jauriaanejeein nenea rai nichao jianeein nii ena nenea ichaonaa enachasine que ichoae cacha.

¹⁸Nitohaneente Jesocurisito aina cuaain ichae Cana Coaunera, que nejeratenaa rijijieein nenea caje aina jiniiquiin ita belaaïn raotojoein nihacachene coina. Nii jaunte canacaanu letoae inara que coitucueratihacaanune, inara netonai aina jiniiquiin raotojoein neeichene coina.

¹⁹Cana Coaunera nitohanein Jesocurisito aina cuaain satiin cachani-chaachene osa que suujua acatihane, aina raotojoein jiniiquiin nenea coina ichaain, nii niicha ichai beranu que canacaanu telu. ²⁰Nii jaunte acaneei nenea rijijieein canacaanu tein inara rai bihacaanune coina berate Cana Coaunera. Niine raajenihane aitoha Cana Coaunerane rijitojoein, caa inara rai bihacaanu. Nitohanein Jesocurisito letononihacaanune jaunne, inara rai aitocaaanu, atiin caa inara rai Cana Coaunera beratenojoi tonoraain esenetaain neeichene, inara osa que suujua acatena nainihane coina.

²¹Coatiha aansijieeinijii osa que nesaruhiin niheiluu Jesocurisito niqii. Nete, satiin cana osa coreniha caseteco coaraelu, aina cuaain cana osa que suujua acatein jianacoon cana tihane coina nainatejiha Cana Coaunerane jaun.

6 ¹Nitohanein niicha ichai que Cana Coaunera coroatajaneranein nihacaanune jaunne, inara rai aitocaaanu. Nabana jataain inara belaitohane jaun inara rai Cana Coauneraacha beratenojoi que jaoleconaa coacuelanaala que nerausiaequichene coina. ²Nitohanihane coinatē rai Quiricha inoansi cuhane:

“Canu bajaee bajaeequine aonajihanu.

Chaen nechuu nichotenaajereein, canu ariirijieeine jana, ii ichoterateeu,”

naain bein laenaerateluu, nii coina Cana Coaunera.

Enate, inae nii aitohalune rijijieein ichoteratenojoin nequichene caohachae, inae rai cojoanonaa nihane jaun.

³Coatiha chatohanein baaso ichaain chuni notajaain nihaacaanu. Nabana canacaanuhacha ichai baaso rijijieein cha ichaain neeuruhane, inara rai canacaanuhacha beebejei esenetaelanaala que jaolecohichene coataa.

⁴Nitohanein nenea coacuelanaalane, Cana Coaunera letononein nihacaanune coaratihacaanu, itolere necairichanaa, latijiojoiiriin, caaintati ichaonaa que ichaohin, ⁵taba que canacaanu bisihure, caresero cuhane canacaanu enoaain, taba que canacaanu que nererojoecaure, jataain mainajeriin amihanenaa, sinerena, mijitena, naaonjoainurine abaantacaanu chabana nererojoecaelanaala. ⁶Jerichanejeein nechuu esinae rauhijiriin nii chatohanein baaso ichaelanaala ichaohacaanune coaratihacaanu, esinae rauhijiriin canacaanu aina niha Cana Coaunera Suujuene coaracuruha cachaaurune coina, chunique asilanaala satiin cachaauru belaaïn ichaoin. ⁷Nitohaneina nihacaanu, esinae rauhijiriin canacaanuhacha beebejei esenetaain, canacaanu aina cuaain niicha ichanenu ichaa Cana Coaunerane coaracuruha cachaaurune coina. Nitohanihacaanune jaunne, baasoneein canacaanu tenaajerera nihane, chatohanein baasoneein tenaa coacuhelanaala, rauhijiriin nohanelanaala rai irihacaanu. Nitohaneine canacaanu rai baaso icharanihane, baaso ichaelanaala ichaonaa esine que ichaohin nihaca-

nune que cuaain acaauru rai ereein necocaeratihacaanu.

⁸Nete taba que canacaanu que suujua acateein, taba que canacaanu cotaain, taba que canacaanu que raotojoein ereein, taba que cacha baasoniha canacaanu beein, naajojoain canacaanu que ereeure cachaauru. Nitohaneinte nohanelanaala cachaauru rai irihacaanu natiin, nohanein cachaauru coritaa canacaanu beeure. ⁹Chaen techu canacaanu coitucuuruhane saijieein, canacaanu coitucuhi rijijieein canacaanu coaracure. Canacaanu sohinte niqui canacaanu jaonaa jerecure, nena jaiti ichaaojihacaanu. Canacaanu casetecaauruha niqui, nete canacaanu atinaaurene. ¹⁰Jataain inaderanaanajaanu tocohaneeinte niqui canacaanu ichacure, nena atiin raotojoein rachoojoein nihacaanu. Leinjiin cha coitucuhi cairichei rijijichaanu niqui, nene arajii cachaauru rausiaecaanu canacaanuhacha coitucui que, raotojoein neeuruhane coina.

¹¹Canejeraauru satiin Coriintoo neiniquichene. Esinae rauhijiriinne canacaanu suujua aina cutaain, inara coreniha canacaanuhacha coacuhi que inara rai caa suujuelanaala aitocoaanu. ¹²Coatiha aansijieeinijii inara que asiin irihacaanu. Nete laen inara niha chatohaneine nihanatiin canacaanu que asiiche. ¹³Nii jaunne atiin inara rai aitoon, nere tonoraane coina bereecuru rai iriha cachane rijijieein. Esinae rauhijiriin caa inara rai aitiin nihanune rijijieein, canu que cha suujuelanaala beein neeichene coina.

**Cana Coaunera rai Teenforo
rijijieeinte nihacache.**

¹⁴Jiaonriha chatohanai ichaain neeuruha Cana Coaunera coitucuhichurune, acaauruhacha ichai ichaain

neeichene. Baaso ichajeein ichaona-caauruhacha ichai ichana nainihe caohacha nejesina ichajeein ichaonaa cacha. Nii rijijieein techu jiichoo amuritonaa nainene nocohena. ¹⁵Charijjeein teinti moconajaera belaina nainene Jesocurisito, nii rijijieein techu nainene moconajaera cacha aina chatohanai ichaain nena nainene Cana Coaunera cachanein nena. ¹⁶Nitohanein nena nainihaacache cana, inae Cana Coaunera rai Teenforo rijijieein niha cana jaberocoone jaun. Nitohanein nihacachene cointate:

“Inara aina neeine inara aina jiniiquiin amuhemuhereunni. Canuna inara Coauneraneen. Inarate jana canu cachanequiche,” naain raajenihane aitelu Cana Coaunera. ¹⁷Nitohanihane coina techu:

“Acaauru aina neeichene caje amuhin jelai neeuche. Jiaonrihachu acaauru chosichuru rai lenone acaauruhacha tei dadaain neeichene. ¹⁸Caa inara rai aitocooaunne tonoraain neeichenena inara rareeunni, inara Inacanein nihanune jana, inara canu calaohineein, canu cacununein, naaonjoaaineein neeichene coina,” naain aitelu itolere icharanein nena Cana Coaunera.

7 ¹Niritiinte aite cana rai Cana Coaunera. Aihana jaun cana casetecarihanine que casiin, cana ichao aasajeein, cana suujuene maajeein itajenaa nainera que nechohalajiin nihacachenete ne. Nii jaun baaso ichaelanaala raujiaaincha cana rai Cana Coaunera aitoonjoan rijijieein ichaoha cachenete caohachaera canejeraauru.

**Cana Coaunera coitucuuruhane
coarateeuruha Coriinto
cocoaichacurune.**

²Caohachaaain inara suujua coaraain canacaanu aonacuche. Coatiha chuni rai

baaso ichaain, chuni cairichaaain, chuni coritaain, naaonjoahaacaanulu.

³Coatiha inara que iriha aitohaauun. Inara rai aitocaaunlune rijijieeinne, casujua aina cutaain inara belaaain inara aina jiniiquuin neein ohanune coina jatoroaain neeun, nii te raotojoeiin coitucuhiche inara. ⁴Esinae rauhijiriina inaraneein neeichene coitucuhin, nii chuni que asilanaala inara rai aitoon, raotojoeiin canu coitucuhin neeichene jaun. Itolere necairichanaa coaraain nihacaanune saijieeine, inara coacuhin jataain raotojoeiin corajejin rachoojoeiin neeun.

⁵Masedoniau turuhacaanune caje coauneein aansijieinniji nebetacaaorihacaanu. Itolereenein turuhacaanune jaaunru naineeine necairichanaa coaracaanu. Chaen nechu necairichae-curuha leeochoaurune coaracaanune jaun, canacaanu suujua cubane casihacaanu. ⁶Nete Cana Coaunera, cha ichana coasiha cachane nihanatiin, enaacha que ichana corajerateranein nihane jaun, canacaanu que corajerate turuha Titone aina cuaain. ⁷Coatiha turuhane jaauncha nihei, raotojoeiin neeichene coaraane jaun, acaentonai suujua aninoain corajihane jaunne, canacaanu netonai canacaanu suujua aninoain corajihacaanu. Acate jataain canacaanu coana jeriquichene que aitiin, canu coreniha inaderaain canu que coaauquichene beebeje canacaanu rai. Nii jaune jataain jeelai amuritoheriin rachoojoeiin neeun. ⁸Inara rai quiricha laenacaaunlune jaun, coaraain inaderaaichelune que inae enene netojoehaaun. Jariaalune niqui, nii inara rai quiricha laenacaanune jaun, inaderaaichelu carajaelanaalane coitucuhin netojoeetonlu. ⁹Nena laen inae enene nii inara rai quiricha

laenacaaunlune corojeeun. Coatiha inaderaaichelune coroaehaaun. Nii inaderaaichelune aina cuaain inae nacoauneein jeriha Cana Coaunera rijijieein ichaohichene jaune corojeeun. Inarate jeriha Cana Coaunera rijijieein nii inaderanaa abaantaain neeichelu. Aihane jaun coatiha inara rai baaso ichaa nii quiricha laenahaacaanulu. ¹⁰Nitohanejin jeriha Cana Coaunera rijijieein, inaderaanaa abaantaain cana ichao coreein nihacane, nii coreniha nichoterichaacheeine jaun, nihei chaque netojoeeina jaanu. Nete laen Cana Coaunera coitucuhichuru nechu baasohacha que coacuhin, itolere bana inaderaauruha, niha leijiin itolere necairichanaa caje cana rocoerane que coacuelanaalane jaun inae nitaje rai neeure. ¹¹Nete laen inara, jeriha Cana Coaunera rijijieein inaderaain, cha abaantaain neeichene jaun, inara rai bihanune rijijieein ichaain canu cocoaerateichelu. Chaen techu nii choae tacaain obajejin, casiin, naaonjoaichelu. Nete aitiin, nii baiha canu coaana jerejin, nii inara jana baaso ichara casetecaachene coina inae jatoroaain neeichelune jaun, esinae rauhijiriin inara nii ujuaihoneein neneeichene coarateichelu. ¹²Nii inara rai quiricha laenacaaunlune bana, coatiha nii baaso ichara cacha que coacuhin, niheichu nii baaso ichaane jaan cacha que coacuhin, naaonjoaain laenahaanlu. Cana Coaunera notaracaae canacaanu coacuhin aitocaaunlune rijijieein ichaquichene coarateeichene coinane inara rai laenacaanulu. ¹³Niite jataain canacaanu suujua nunaain, canacaanu suujua aninoaelu.

Nete nii amuritoheriin canacaanu rachoojiae Tito, inae raotojoeiin neeichene coaraain suujua aninoain nacoauneein niicha ichaneni corajera-

teeiche quene jaun. ¹⁴Nii Tito raine, chatohaneein inara rai baaso ichaeniha-nune jaun, jataain inara aina raotojoeein nihanune que aitoonlu. Nii nohanelanaala inara rai aitocoanulune rijijieein nechu, inara coreniha raotojoeein nihacaanu que aitocoanulu nohanelanaala Tito rai. ¹⁵Chaen techu nere tonoraain que inara suujua acateein raachelune coaucane nainein, inara ainaacha itolere bana nena jere nii Tito. ¹⁶Jataaine rachoojoeun, inae inaraacha ichaneni coitucuhin nena nainequichene esenetaanune jaun.

Arajiin niicha teenihuru taojiaauruha Masedonia nenacaaurune.

8 ¹Canejeraauru enane laen, Masedoniau nenacaauru Jesocurisitoranojoein nenacaauru belaitohane coaratihia, acaauru que Cana Coaunerane berichaanuhin inara rai. ²Jataain maainajeriin cojunojoein neeuruhalune jaun, necairichaaurulune saijieein, inae chaque tonajelanaala raotojoein enene neeure. Nii jaunte cairicheinejeeunruhane saijieein, coriquihonanein nena rijijieein jataain arajiin, Cana Coaunera rai nii niicha teenihuru taojiaaure. ³Canuna jataain arajiin nii tenaa nainecuruhane amuritoheriin, chunaelanaala nii Cana Coaunera rai niicha teenihuru teeuruhane coaraun. ⁴Chaen techu canacaanu rai aitocure nii niicha taojiaauri amaain, Cana Coaunera cachanein nenacaauru rai tihacaanune coina. ⁵Nitohaneeinte taojiaaururichaaaine coaucaanne amuritojoaain teeure. Jauriaanejeein Cana Coaunera rai benatecuruhane baihate, jeriha Cana Coaunerane rijijieein canacaanu rai teeure. ⁶Nii jaunne Tito rai aitocoanu leeochoauru rai caohacha ichaa,

inaraacha taojiaai raa uha inara caje, jauriaa aihalune rijijieeine coina. ⁷Inara leeochoauru amurijiriin esenetaain neein, cha que tonajelanaala leeochoauru rai erena inaa, itolere coitucuhin inara relaacaanune jaan rijijieein jereein neeichene coina jatoroaain, naaonjoaain neeichene jaun, nii rijijieein leeochoauru amuritoheriin, leeochoauru latijiojiriin nenacauroatajanequichene coina ichaquichene ne. ⁸Coatiha inara letoaa inara rai binaaun. Caohatiin ichacuruha leeochoaurune coitucuhin aina cuaain leeochoauru belaaichene coarateein inara netonai tenaa nainequichene coina ne aitoon. ⁹Inarate jataain itolere que nelatein itolere ichana naineranein nihane saijieein, jataain inara belaitohane jaun, aina cuaain rausiaenojoein raotojoein neeichene coina, inara coreniha cha que nelatihei rijijieein cairichei coaraain nihalu Jesocurisitone coitucuhiche.

¹⁰Inara rai caohachanu quene, nii que inara rai aitoon. Inae inara, leeochoa jaanaa bana inae nitohanei ichana nunuheteichelune jaun, satono que tiaain ichana corajeeuche. ¹¹Aihane jaun nii jauriaanejeein tenaa nunuheteichene bana corajeein teechulune coarateeichelune rijijieein, enene tenaa nainequichene jeeonijhanaain tihajein leeochoauru coroatajaniha inaraacha teenu taojiaaichene nainacuche. ¹²Chunocoha Cana Coaunera rai cha tenaa jereein tenaa nainihane jeonejeein tihanete, raotojoein nii niicha tei rareein Cana Coaunera. Coatiha cha sirinihane saijieein, cha tiha cachane jerihe Cana Coaunera. ¹³Coatiha cha sirineeichene nihanatiin, leeochoauru rai acaihaniji teein necairichaaichene coina erena nihein. Raujiaain ita rijijieein ita coroatajanein

nihá cachane cointate erenaane. ¹⁴Enate inara, acaauruhacha sirihei siriquichene jaun, acaauru rai tenaa nainequiche. Acaauru netonai cabaiha inaraacha sirihei sirichuruhane, inara rai netonai tenaa nainecuruhane coina. Nitohanihanete ita rijijieein inaraacha latei siriin neriquicheein, ita amuritoheriin sirina coacuelanaala. ¹⁵Cana Coaunera Quiricha cuhane: “Nihei cautihei amuritoheriin raera rai. Niheichu lanaai fautaeriin raera rai,” naain laenanohinihane rijijieein.

**Rai corihaneraauru aina Tito
letoaauruhane.**

¹⁶Nariha Cana Coaunera inara que coaaucaunne rijitjoeein inara que coaauca Titone coina, casuujua rijitjoeein rai suujua tihane coreniha. ¹⁷Nii jaunte acaentonai inara que coaucane jaun, rai aitocoaunne tonoraain inae suujua caje coauneein inara coaraa uhe. ¹⁸Nii Tito jiniichaaine inara rene leinjiin cana nejera letoaaun. Acate raotjoeein coitucuure leeochoauru Jesocurisito ranojoiuhuru, acaauru rai ichoteratenojieein nerichaacheeine beebjia raotjoeeine jaun. ¹⁹Nii jaunte nii ichoae tacaain acajaniichure Jesocurisito rai iclesianein nenacaauru, canacaanu aina amuhemu-jueein, cairicheinejeein nenacaauru rai Cana Coaunera que canacaanu suujua acatein nere tonoraain leeochoauru coroatajanena jerichaanune coaratihacaanune coina, taojiaain letoanojoin raeranu que canacaanu coroatajaneraanu que. ²⁰Nitohaneeine ichana jerichaanu, nabana tonaain canacaanu que ereein neeuruha cachaauru, nii leeochoauru coroatajaniha tenojoi canacaanuhacha taojiai quene coataa. ²¹Nii jaunna Cana Coaunera notaracaae, cachaauru notaracaae, naaonjoaain

itolereenein caohachaaain ichana jerichaanu.

²²Acaauru jiniichaaí nechu leeochoauru cana nejeraauru caje unaa leinjiin cana nejera letoaaun. Acate satiin canacaanuhacha ichai que canacaanu coroatajanein, acaentonai ichaane coina jatoroaain nihane coarate. Nii jaunte teriquicheein inara netonaine esenetaane jaun, jataain ena jeelai amuritoheriin ichana jere. ²³Chunocohacuru inara caje: “Chariji cachana caa inara aina uhin turue” naain Tito bajaauruhane: “Caate Faboro corihaneranein, cana coroatajanihane que coroatajaneranein nenaane,” naain acaauru rai beeuhe. Jerichaneto-joeinchu, nii coroatajaain aina unacaauru cana nejeraauru bajaeranihane: “Caaurute leeochoauru Jesocurisito rai iclesianein nenacaauru letononein unacaauru ne. Chaen techu Jesocurisito ere tonoraain, naitoonjoan icharaneí nenacaaurune,” naain acaauru rai beeuhe. ²⁴Chaen jataain acaauru belaaichene coarateeuchete: “Esinaenachuhisi catohanein ichaaoruhane jaun, acaauru coreniha raotjoeein neeuruhate,” naain inara coreniha raotjoeein nihacaanune esenetaauruhine leeochoauru Jesocurisito rai iclesianein nenacaauru.

**Leeochoauru cana nejeraauru rai
inaraacha teenu.**

9 ¹Inae raotjoeein inara rai bihanune latelanaala, tenaa nainequichene coitucuhanune jaunna canaacha esenetai coreniha cana nejeranein nenacaauru rai, taojiaain inaraacha letoaaenu que aitiin inara rai laenaeneun. ²Nii jaunna itolere bana raotjoeein Masedoniau nenacaauru rai, inara Acaiha bataneu nena Coriintoo neiniquichene, inae taolu ajaanaa

situsina bana caje coaaneen inae nitohaneen leeochoaauru cana nejeraauru coroatajanequichelu jatoroaain neennee beebejeen acaauru rai. Nii ainate caohacha ichaa leeochoaauru coroatajaniha ichaquichene coaraain, neleruhin amurijiriin acaauru netonai ichana corajeen, inae jatoroaain neeure, acaauru netonai ichacuruhane caina. ³Nii coaranu quene caa cana nejeraauru letoaaun inara rai beranu que, letona jatoroaain neeichene caina. ⁴Nabana inae uhanune bana, canu aina uuruha Masedoniau nenacaauru tabaaunijine, acaauru aina uhin jaiti ichaeneeichene jana inara rene turuhacaanune coataa. Nitohaneen ichaquichene esenetaain leeochoaauru rai beebejihanune saijieen, jaiti ichaeneeichene jana turuhacaanunete laen jataain canacaanu rai necoejena tiha airiquicheen. Chaen techu, inara raajenihane inara rai nocojena tiha airiquicheen. ⁵Nitohanihane coataanejian, jauriaanejeen ichoaichaniha uhin inara coaraa uruha nii cana nejeraaurune jerichaaunne jaun, acaauru rai aitoon inara coaraa uuruhane caina. Jaiti nii aitocoichelune tocuhaneen taojiaaichene nainaeneeichene, inara coroatajanecuruha taojiana quene caina. Nitohaneen inae jatoroaain taojiaain neeiche jana, inara rene turuhacaanunete laen, esinae rauhijiriin chunaelanaala tenaa jereen teeichene coaratiha leeochoaauru amuritoheriin teriquicheen.

⁶“Chunocoha coroatajajeen temule jaerate, coroatajajeen taicheen. Jana arajiin temuerate arajiin taicheen,” naain niha erenaane que coaucuche. ⁷Aihana jaun le cachaaurute naine suujua cuhane coacuhin tenaa jerihane jeonijihanaain tihane caohachae. Nainihe chunocoha tenaa jerenihane,

tihane caina conujiha chunine. ⁸Itolere quete inara coroatajanereen Cana Coaunera, itolere bana latequichene rijjijieen inaraacha latei siriin neeiche cauteenne, nii caute que leeochoaauru coroatajaniha acaauru rai teen, naaonjoaain caohacha ichajeen ichaohichene caina. ⁹Cana Coaunera Quiricha cuhane:

“Cairicheinejeen ichaonacaauru cachaauru raite, chunaelanaala acaauruhacha latei te. Acate chabana satonoelanaala itolere bana caohacha nejesina ichareen,”

naain laenanohineen ne. ¹⁰Cana Coaunera temule jaera caina rai nucuhe teraneen lenonene maajeein teranihane jaun, nii rijjijieen Aca inara rai arajiin nucuhe tereen arajiin temuhin arajiin taojiaain neeichene, latejiojiriin nenacaauru coroatajaniha teeichene caina. ¹¹Nii ainate itolere siriin, cha latelanaala raotojoein neen, jelai amuritoheriin leeochoaauru rai tenaa naineriquicheen.

Nii canacaanu aina, inaraacha letoaaun inaraacha taojiaa corenihate, Cana Coaunera coroaecurureen leeochoaauru cana nejeraauru. ¹²Coatiha acaauru rai lanaane jauncha, nii acaauru rai inaraacha taojiaa amarihacaanuhin, nechu Cana Coaunera coroaecuruha inara corenihane coinane amarichaanuhi. ¹³Jesocurisito aina cuaain, enachasine ichaonaa que ichaohichene coaratihate nii inaraacha siriin taojiaain letoaiche. Nii te coaraain Cana Coaunera coroaecurureen. ¹⁴Nii ichoae tacaain techu, jataain inara belaaun, inara rai Cana Coaunera bajaaurureen, inara belaitoha Cana Coaunerane coaratiha ichaquichene coreniha.

¹⁵Narihara Cana Coaunera, nitohanei ichana nainichaachene jaanu tihane

coreniha. Nihei que tonaain erenaana-jaanu.

Afosotoroneein cocoinanohinihane coaratenaa jeriha Faborone.

10¹Canuna Faboroneein inara belaiha Jesocurisitone rijijieein inara belaaichaaunne jaun inara rai aitoreeuni. “Inara caje coriaae nihanune ereene, enaacha inara rai tonaain ereeun,” naauruhane coitucuhanune jaun. ²Nii jaunna inara rai aitoon, nii joaereein cacha rijijieein, cha ichaa canacaanu beracuru aina, nii rucujueein neeichene jana, inara rene turunaa jerichaaunne jaun. Inae niritocuruhane rucuhacaun acaauru ainane coina jatoroaain urichaaunni. ³Esinae rauhijiriina niqui cachanichaanu, nena niha chatohanei rucuheneacaine, aihuruha Cana Coaunera coitucuelanaala nenacaaurune rijijieein rucujue-nihacaanu. ⁴Coatiha niha chatohanane caa chauratane que nena que biji achunequiin neein rucuhehaacaanu. Nii canacaanu biji achunete Cana Coauneraacha ichana nainei caje unaanein, itolere que laraajiin nena jerenacaauru amuritiin itajenaa naineranein nena ne. ⁵Nitohaneine canacaanu que ereein, Cana Coaunera coitucuruha cachaaurune coina beebejihacaanune caohateraauru itajerichaanuhin. Itolere cachaauruhacha coacune Jesocurisito rai tein nihacaanu, leinjiin Acaacha tonoraain neeuruha cachaaurune coina. ⁶Nii jaunne esinae rauhijiriin, canacaanuhacha beebejei esenetaain tonaraain neeichene, nii tonoranajerelanaala nenacaauru casetecarichaanuhin.

⁷Inarate itolere bana inaraacha coarai cacha esenetaquiche, itolereenein coitucueralanaala. Aihana jaun chunocoha Jesocurisitohacha jerei

icharate, canacaanu netonai Jesocurisitohacha jerei ichacaunne coaraain coitucureein. ⁸Caa cocoinanohi nichaaunne rohin canu ere tonoraichene coina inara counujichaaunne que coatiha coejinaaun. Cana Coaunera, canacaanu cocoinaain nihalu inara que Acanihane coitucueratihacaanune, nere tonoraain neeichene coinana jaun. Coatiha inara itajihacaanune coina, canacaanu cocoinaain niheilu Cana Coaunera. ⁹Niheichu caa quiricha cuhane cuaain inara casataa aitohaaun. ¹⁰Inara aina nenacaauru tabaaurute: “Nechu quiricha cuhaneicha cuaainjene mijiaaanein inara rai aitoon. Nete laen inae inara aina nihanune, inara rai tonaain mijiaaanein erenereuni. Coatihaje cacha rai irihanune tonijiaain cacha rai erenaa nainichaaunne coalanaala,” naaure. ¹¹Nena laen mijiaaanein erenaa nainenihacaanune saijieein, coriaae caje quiricha cuhane cuaain mijiaaanein aitocooaanune rijijieein, inae inara rene turuhacaanune bana icharichaanuhine coitucuha nii aistine jerichaanu.

¹²Coatiha nii raajenihane necohasitaain nenacaauru rijijieein nena jerihacaanu. Nete laen acaauru cha coitucurenihane jaun, leeochoauru amurijiriin niha nocoetiin raajenihane necohasitaure. ¹³Canacaanu laen coatihacaanuhacha ichana nainei rohin necohasitanaa nainihaacaanu. Nii rijijieein chu Cana Coaunera cachaauru relaacaanune jaanru cojunacateranein nihane jaun, nii canacaanu rai cojunacatihane jaun rohin turunaa nainihacaanu. Nii jaunte Aca canacaanu turuaelu Coriintoo neiniquichene rene tiaaojoaain. ¹⁴Aihana jaun coatihacaanuu rai cojunaca rohin turuhacaanuu. Chabana inara rene turueniha-

caanune saijjeein, ena turuhacaanune jana nihanena laen, canacaanu rai cojunaca rohitiin tururichaanu.

Canacaanune jaiti inara rene turueniha chunine jana, ichoachaniha inara rene turuhin, Ichaonaa Enachasine teraniha Jesocurisitone beebjihacaanulu inara rai. ¹⁵Coatiha chabana turuenihacaanune jaan turuhin, chuni amihaneero ruluhin neroranein nihaacaanu. Nitohanein canacaanu turunajanihei cunaa coacuelanaalane, inara ainaacha neein Cana Coaunera icharatenojoin amihanenaa ichajerichaanuhi. Aiha leinjiin Acaacha esenetaain ichaohin, ichacaanune jerequichenene airichaanuhin. ¹⁶Chaen nechu, nii neeichene jaan jelai caje coriaae cuhin, osa caje nichotenaa nainecururichaine beebjenaa jerichaanu leeochoaauru rai. Nene laen, inae cachaauru relaauruha leeochoaurune jaan turunaa jerenihacaanu. Nabana leeochoaauru amihaneero ruluhin necohasitanaa tochanihacaanune coataa.

¹⁷Chunocoha raajenihane necoasitanaajerihane, Cana Coaunera coasitaanne. ¹⁸Cana Coaunera coitucueraneei rai cachanein nenea cachate, Cana Coauneraacha ichanohicha coasitaain ichoae, chabana raajenihane necohasitanaa coacuelanaala.

Afotoneein niha nocoetonacaauru que ereereeca Faborone.

11 ¹Bajiaanachuhinti cha coitucuhi jaelorohe rijitjoein inara rai ereereecaanne rautaaan aonaeneeiche. Atiin aonacuchene inara rai aitete coitucuhiche. ²Jataain leeochoaauru esenetaain acaauruhacha ere tonoraain, Jesocurisito esenetaaichene jianequichene jaan rautaeniha Cana Coaunerane jaan quene inara rai aitoon. Canune rai lanaacha ere tonoraain neeuruha

enecurune rijijeein, leinjiin Jesocurisitohacha ere tonoraain neeichene coina, rai inara tein inara que coitucuerateenlu. Nii jaunna leinjiin Acaacha ere tonoraain queecha coaauquiche leeochoanein inara suujua cuaelanaalane coina aitoon. ³Nena laen Eba coritaalu acanone rijijeein inara coritaeranihane esenetaaichene coasihun. Nabana Jesocurisitohacha que coacuhin neeichene jianein, leeochoa que coaauquichene coataa. ⁴Inarate inara relaacaanune jaan nihei que, nechu nejelaunein cuaain Jesocurisito nihei que inara rai ereeuruhane rautatiin neeichene jaan, Cana Coaunera Suujue inae inaraacha esenetailunihei esenetaain, osa caje ichotenojoineriquicheeine jaan, inaraacha esenetailunihei esenetaaiche. ⁵Coatiha nii inaraacha esenetaacuri, afosotonichaanune amurijiriin niha nocoetonacaauru fautaain nenea jerinaaun. ⁶Cacha rai irihanune que nelatinaaun niqiu, nena laen esinae rauhijiriin coitucuan banejelanaala. Niite raotojoein coitucuhiche inara, satiin canacaanu ichanaa coaranein neeichene jaan.

⁷Inara rai baaso ichaana, inara caje core bajaelanaala inara fautaeriinein nenea rijijeein neein inara relaunlu ichoteratenojoein nerichaacheeine que, canu amurijiriin neeichene jerenacaan. ⁸Nitohaneine inara caje chaelai bajanaa coacuelanaala, leeochoaauru Jesocurisito ranojoein nenacaauru coriqui ruluera tochaneein raaunlu, inara coroatajanena nainichaaune coina, canu rai teeuruhane rijitjoein raanune jaan. ⁹Coatihachu inara aina nihanune bana, inara caje cha latein cha bajaain nerejetohaaunlu. Masedoniau caje uhin turunacaauru cana nejeraauruhachate

canu rai canuhacha latei terejetocurelu. Aihana jaun coatiha inara caje cha bajarejetohaaunlu. Nirijieeine itolere bana nereeunni. ¹⁰Nitohaneeine satiin Acaiha batane sacutaain turuhanune jaaunru naineein neeunlu, esinae rauhijiriin Jesocurisito coitucuhin rijijieein naitoonjoan tonoraain nihanune jaun. Nerinaain canu caje nii ruluera. ¹¹Coatiha inara cotaiha aithoaaun. Jataain inara belaichaaune jaunne aitoon. Cana Coaunerate jataain inara belaichaaunne coitucue. ¹²Nena laen inara aina inae canuhacha ichailu ichajeein sacureeunni, nabana nii canacaanu rijijieein raotojoein nena coaauca nocoenacaauru rausiaecaaunne coataa. ¹³Acaaurute nechu casejeeein, Jesocurisito letono afosotoniha nocoetocure. Nete esinae acaneein aitocurene. ¹⁴⁻¹⁵Coatiha enaacha nihei nitohanei. Moconajaera netonai, Cana Coaunera cononiha nocoetiin tocohaneein nedaane jaunte, rai letonocuru netonai rijijieein neuruhane jaun, cacha caohacha rijijieein inanacaure. Nete, caohacha ichacurenihane jaun, ecu tihane bana casetecaain itajenojoiniha cuurureein moconajaera aina jiniquiin.

Jesocurisito letono afosoto nihane jaun necairichaa Faborone.

¹⁶Nacoauneeine coitucuhichene coina inara rai aitoreeunni. Jiaonriha cha coitucuenihanune jaun leinjiin jaelorohe rijijieein iriha canu biha chunine. Atiin canu aonacuhene inara rai aasaeriin necoasitaete aonaquiche. ¹⁷Coatiha jeriha Cana Curuanaane jaun nii necoasitarihaauni. Nechu cha coitucuhi rijijieein ereerecaane jaune aitoreeunni. ¹⁸Coaracuchenachuinti, Suujua caje rocohin niicha ichai coasitaauruha nii leeochoaurune, nii rijijieeinechu canuhetonai necohasita-

reeunni. ¹⁹Inarate niqui itolere coitucuhiche. Nete cha coitucuelanaala nenacaauru cachaauru inara relaauruhane, acaauru aonaain acaauru rautatiin neeiche. ²⁰Nitohaneichene jaun te inara basijiauhin, inara coritaain, inara que jaolequiin, inara meri faoracaain, naaonjoauruhane niha natiin acaauru abaantaain neeiche. ²¹Jataaine cojeeun, nelatihei rijijieein nii aihuruhane tocohaneein nenaanaine-nihacaanune jaun. Nene laen, necoasitanaa coaaucuruha nii leeochoaurune canuhetonai necohasitareeunni. Cha coitucuhi rijijieeine ena caa ereerejeeun. ²²“Canacaanune Ebereeo nichaanu” naauruhane, canuhetonaine Ebereeo neeun. Jana, “Canacaanune Isaraelita nichaanu” naauruhane, canuhetonaine Isaraelita neeun. Jana, “Canacaanune Abaraaun nefoeratenichaanu” naauruhane, canuhetonaine Abaraaun nefoerateneeun. ²³Jana, “Canacaanune Jesocurisito letononeein nihacaanu,” naauruhane, canune jataain acaauru amuritoheriin acaneein neeun. Cha coitucuhi rijijieein aitocoanne nihantiine, esinae rauhijiriin aitoon. Canune acaauru amurijiriin amihaneein araaisaain caresero cuhane enoano-joinnein, acaauru amurijiriin mainajeriin bisinojoinnein, araai saain onaa caje nichoteein, naajoaain neeun. ²⁴Saoqui sai cuhanete, nichatachoonca isocoon tacanei bisicha que canu casetecaure Jorioocuru. ²⁵Nii rijijieein techu nichata sai cuhane enuha que canu faojaain, lesajei que ajeri que canu bodoosihure. Nichata saicuhanetechu naluha cuhanune jaan botena jaun ohanune rai neeunlu. Nii jaunna lesajei que cucuana cataaun, lejiichoo lejanotiineein neeunlu. ²⁶Araai saain nucuhe cuhane amuhanune jaaunrune necairichanaa coaraaun. Tabaauru quene canu

basijiaauruha asijiautoorune que, chatohaneein canu teeuruha canu araachuru Jorioocurune que, nejelau cachaauru nihanatiin chatohaneein canu teeuruhane que, naonjoaainunri que casihun. Jerichanejeeinechu, neseeuuru nihanune jaaunru, bero cuhane, cucuhana cuhane, naonjoaainunru nihanune jaaunru, necairichanaa coaraain neeun. Nii rijijieeinechu, necairichanaa coaraain neeun, nii Jesocurisito coreniha cana nejera niha nocoetonacaauru cataaun nihanune. ²⁷Chaenechu mainajeriin amihaneein necairichanaa coaraaun. Tabaauru que sinilanaala, tabaauru que mijitena aina cocoirena abaantaain, naonjoaun. Araai saain tabaauru que lenoninaaun. Jelaronaa caaunne taba que necairichaaun neniha canu cajionene jaun.

²⁸Nitohaneein itolere que necairichaanune saijieeine, jeelai amuritoheriin satiin Jesocurisito ranojoneein nenacaauru iclesiacuru que coacuun. ²⁹Nii jaunna chunocoha cunaitihane inaderaaun coreniha. Jana chunocoha suujuateeuruha baasoneein suujua coaraane coinanete, jataain canu baijiae. ³⁰Canu necoasitaanunena nelatenihanune nainejeein canuhacha ichai que necoasitareeuni. ³¹Cana Curuaanaa Jesocurisito Inaca Cana Coaunera itolereneein coroaenjoineein nenaate, esinae rauhijiriin nohanelanaala aitocooaunne coitucue.

³²Damasoco nihanulune banate, *rey* Aretasi rai coberenadoroneein nena rai coardiaauru letoaelu, nii nese rai rijia bacuujuuaru naineein neein canu cojoaain canu mucuuruhane caina niqui. ³³Nete nii coitucuriin, omari seeonjoa cuhane canu teein, nii nese rai rijia bujuau, acuujuua laojoiri ucuun nena cuhane cuaain canu faauruhane jaun acaauru caje nichoteeunlu.

Notajaain que necoitucueratiha Jesocurisitone beebjeiha Faborone.

12 ¹Nihei chaelai que rai cainera, raajenihane necohasitaain niha cachane. Nena laen canu, canu notajaain canu que niicha ichai coitucueratiha Cana Curuaanaane bereeunni inara rai. Aihana jaun coatiha canu raajenihane necohasitaa aitorihaauni. ²Inae lechoonca jena jaanacaa Jesocurisito esenetaerani-chaaunne dede nichata burihu amanojoinichaaunlune. Nechaainti canu jaberoconeein amanojone nihanulune canu suujueneein amanojoin nichaaunlu. Coatiha coitucuhaaun, Cana Coauneraachate coitucuujuue. ³⁻⁴Nena laen esinae rauhijiriin dedeeu amanojoneein, ecu chabana aohanraai erenaa aonaaunlu. Nechaainti canu jaberoconeein netiin aonaenihanulune, canu suujueneein netiin aonacaunlu, Cana Coauneraachate coitucuujuue. Nihei chuni cacha que chabana aohanratenojoneein nihei nii canuhacha aonai erenaa. ⁵Chunocoha nitohaneein nihanena naineen coasitaanune. Nene laen caraajenihane niritiin necohasitaanaa naineneun. ⁶Coatiha esinae niqui, necohasitaanune nohaniha aitorihaaun, esinae rauhijiriine casajenelanaala aitoreeun. Nena aitona jereneeun, nabana ainihanune saijieein nechu canu esenetaera caina aitoa canu beeuruha cachaauru coataa. ⁷Nitohaneein canu notajaain niha Cana Coaunerane aina cuaain nabana canuneein nihanune rerohin necohasitaanune coataate, leinjiin moconajaera tenojoi cunai tocohaneein, oja que foconojoi rijitocooaain canu jaberoco cunaitaerate Cana Coaunera. ⁸Nii jaunne niqui, canu jaberoco caje nii cunaitaera jaohane

coina nichata saain Cana Coaunera rai aitoon. ⁹Nete, “Nelatelanaala nenacaauru aina cuaain canuhacha ichana nainei coaratihanune coina ichacaane jaunte aaicha. Jataain, ii belaitohanune jereeine jaunte nii aaicha,” naain canu tonorae Cana Coaunera. Nii jaunne, canu rai niritoha Cana Coaunerane jaun, jataain rachoojoein neeun, chaque nelatenihanune saijieein canu aina cuaain niicha ichana nainei ichaa Jesocurisitone coina. ¹⁰Nii jaunna nelatenihanune que ereein, latijiojoiiriin, arinojoeinein, Jesocurisito coreniha necairichaaain, naonjoaain nihanune saijieein jataain rachoojoein ichaaon. Nitohaneeine, itolere que nelatihei rijijieein nihanune saijieein, jataain itolere que laraajiin neeun.

**Coriintoo Jesocurisito ranojoeinein
necaauru iclesiacuru que jataain
coaauca Faborone.**

¹¹Inara canu rai lerateechene jaune, cha coitucuhi jaelorohe rijijieein inara rai ereerejeeun. Inara, canu coreniha erenaa nainequichene saijieein, acaauru fautaain nelatenihanu que, inara rai ereeuruha nii Jesocurisito letono afosoto niha nocoetonacaaurune jana, acaauru rijijitoein acaauru esenetaain acaauru ere tonoraquichene jaunna aitoon. Coatiha nii canu amurijjiiriin nenea jeriha nocoein ereeuruhane que tonajihaaun. ¹²Nena laen canu Jesocurisito letono esine nichaaune jaun, inara abantaain itolere cojoelanaacojoai ichaaain inara notajaain neeunlu. Nii cajete esinae rauhijiriin canu afosoto esine nichaaunne coitucuhiche. ¹³Inara rai cotainacai que irihanune, canu que inara suujua acatecuche. Jerihane leeochoaauru Jesocurisito ranojoeinein nenacaauru iclesiacuru caje, canuhacha latei

bajarejetocooaunlune rijijieein, inara caje canuhacha latei bajaenihanune jaanne jerihane, inara rai baaso ichaunlu.

¹⁴Inae jatoroaain nihanu, nacoauneein inara coaraa uhanune coina. Quete nichata sareein inara rene turuhanune. Nenechu inara caje canuhacha latei bajaanune coina ainereeeunni. Coatiha inaraacha sirii latichaaune jaun coina airinaauni. Inara caohachanu que inara corootajanichaaune coinane inara rene turuha ureeunni. Rai bereecuru caje cha latein nelanaalate, rai bereecuru rai acaauruhacha latei tein ne acaauru inaca. Nii rijijieeinechu canuhetonai inara inaca rijijieein nihanune jaun, inara rai nelatichaaune coina neeun.

¹⁵Nii jaunne, acaihaniji canuhacha ichana nainei ichareeunni inara caohachanu que. Canu jaberoco nihana-tiine inara coreniha tereeeunni. Nete, nitohanein inara caohachanu ichaaain, jataain inara belaaain inara corootajana jereein nihanune saijieein, canu que nererojoeaaain, canu coointeein, naonjoaain neeiche.

¹⁶Coatiha niqui inara rai chatohanei ichaaain nihaaunlu. Nete inara tabaauru: “Acaauru coritaainjena baasoneein osa que acaauru ichao saruerateen,” naaure. ¹⁷Niheichu coatiha nii cachaauru canuhacha letoaaauri que, inara coritaeratihaaunlu. ¹⁸Canu jerichaaune jaunna, nii corootajai cana nejeraauru aina Tito letoaaunlu, inara coaraa uhane coina. Chaen techu inara raotojoein Tito aina ita rijijieein ita suujua que suujuaain, inara corootajani-chaanulune coitucuhiche. Nii jaun chasiina inara coritare Tito.

¹⁹Jerihanete: “Canacaanu que inara suujua acatequichene coinajecha inara rai aitocooaanu,” naaiche. Nete aine. Nitohanei coacuelanaalane Cana

Coaunera notaracaae, cojoerihu Jesocurisito letononeein nihacaanune jaun, coitucuhichene coina aitocooanu. Satiin caa inara rai canacaanu aitoonjoate, jelai amuritoheriin Cana Coaunera coituhin ichaohichene coinanera canejeraauru. ²⁰Inara coaraa uhanune bana, baasoneein neeichene jana inara eruhanune rautaenihanune, inara netonai rautaeneeichene coataane aitoon. Nii jauna ita suujua rijijieein coacuelanaala, ita que necoelaain, ita cotaairiin, inara rainuhacha que coacuhin, leeochoaauru cairichaa nohaneein, ita que ereein, necohasi-taain, ita caje neleruhin, naaonjoaain neeichene jana, inara rene turuhanune que necoatoon. ²¹Chaen nechu nacoauneein inara rene turuha uhanune jana, inae Jesocurisito esenetaeraneein neeichene saijieein, chabana nitohanei osa que nesaruna naineniha cachane saijieein, inara amute quicha aina osa que nesaruhin neeichene Cana Coaunera notaracaae inara que necoejeein chanareeunni.

Acaauru suujuateein necoiha Faborene.

13 ¹Nii inara coaraa urichaaunine quete, inae nichata sareein inara rene tururichaaunine. Aihane jaun nii caitono tocohaneein niha chatohanei rucuhencaine, nihanete ne coroatajaain nichatajaain, naaonjoaain baaso ichaane coaarain beranu. ²Nii jauriaa osa que nesarunacaauru rai, satiin inara rai, naaonjoaain raine caa coriaae caje coauneein aitoreeunni. Nii inara coaraa uhanune coroata sacuhane, caraajenihane inara rai aitocooaunlune rijijieein, inae nacoauneein inara coaraa uhanune bana, niha chatohanei ichara inara janane inae laen nii baaso ichara que canu suujua acaterinaauni, ³Jesocurisito letononeein aihanune

esenetaeneeichene jaun. Coatiha chaque nelatenihane jaun, inara aina niicha ichanenu ichaai Jesocurisito. Acate inara que itolere que laraajihane coaratenaa naine. ⁴Esinae techuhisi cairichei ichara rijijieein coroso que teein atinaaurelu niqiu. Nete niicha ichana nainei ichaain ichatihalu Cana Coaunerana jaun enanetojoein ichoae. Nii rijijieein nechu, canacaanu netonai nelatihei rijijieein nihacaanune saijieein, niicha ichana nainei ichaa Cana Coaunerane aina, aina jiniiquiin ichaohin laraajiin nerichaanuhin inara coroatajanichaaunne coina.

⁵Aihana jaun inara raajenihane inara suujua cuhane Jesocurisito esenetaeraneein neeichene jaun, esinae rauhijiriin baaso ichaeneeichene coaracuche. Tana inara aina niha Jesocurisitone coitucuhichene. Nii jaun coujunojoinequichene rijitojoein inae baaso ichaquichene coitucuriquichene. ⁶Nena laen canacaanu jerichanejein nii leeochaneein coacuelanaala nihacaanune coaraain coitucuhichene jerichaanu. ⁷Nii jaunna Cana Coaunera bajaacaanu inara coreniha. Nabana nenacaain baaso chaain neeichene coataa. Coatiha canacaanu baaso ichacaanuna jaun nihei. Nechu inara caohachanu ichaquichene jerichaanuna jaunna canacaanu baaso ichara rijijieein aitocooanu. ⁸Nitohaneeine nihacaanu, canacaanuhacha esenetai que jaoleconaa nainenihacaanune jaun. Acaihaniji nii canacaanuhacha esenetai rai caohachanuhachane ichana jerichaanu. ⁹Nii jaunna nelatihei rijijieein nihacaanune que rachoojoein nihacaanu. Nii aina nelararajiaain Aca jerihane rijijieein, baaso ichaelanaala neeichene coinana, inara rai Cana Coaunera bajaabajajeein nerichaanuhi. ¹⁰Nitohanihana jaunna inara coaraa uhane ajiniha caa inara rai beein laenaanu. Nabana Jesocurisito cocoaianohineein

nihanune coarateein, jataain mijiaineein inara rai aitocooaunne coataa. Coatiha inara itajilhanune coina, cocoinanohineein nihaaunlu, raujiaain esinae coujuriu Cana Coaunera cachaneein neein, itolere bana jelai amuritoeriin coitucuhajeein ichaoichene coina, inara coroatajani-chaaunne coinane cocoinanohineein.

¹¹Inae satononejeeine jianichaaunne coina caa aitoreeunicha canejeraauro. Jataaina jiniiquiin raotojoein ichaohin, inara ichao rucujueein baaso ichana coacuelanaala ichaohichene jereeun.

Esinae rauhijiriin corajeein, raotojoein ita suujua rijjijeein coacuhin ichaaoche. Raotojoein ichaohacachene coina cana belaitora Cana Coaunerate inara coroatajanereein. ¹²Coujuriu Cana Coaunera cachaneein, jelai amuritoheriin ita belaa in ita rai ereein neeuche. ¹³Satiin Jesocurisito coreniha cana nejeraneein nenacaurute inara coaacure. ¹⁴Cana Curuaanaa Jesocurisito, inara rausiaemiin cana belaicha Cana Coaunera aina. Cana Coaunera Suujue itolere bana inara aina neeine raotojoein neeichene coina.